

四庫全書

集部

欽定四庫全書

五百家播芳大全文粹卷二十三

宋 魏齊賢

葉 棻同輯

賀啟

太守

賀周守啟

孫正之

伏審傾北海之尊嘗分光于一日擁東方之騎亦均覆

於二天眷幸會之非常喜餘生之有託恭惟某官先賢  
世胄今代人豪公瑾之英烈尚存伯仁之風流未泯百  
年垂裕千里蒙休輟祠館之清資付專城之重寄羣兒  
爵躍已大喧騎竹之迎一老龍鍾猶能進拔薤之隱即  
諧瞻拜但切欣愉

賀江守啟

邵懷英

伏審巧便親聞就臨郡綬優游戲彩無道塗數舍之勞  
寬大頒條有井邑連牆之便益特隆于簡注容自遂於

懇私卧鎮之初歡謠載洽恭惟某官才周物表文擅國  
華丹宸赤墀自結知於明主紫薇青瑣殆歷試於華途  
迺退託於陔蘭更戀瞻於鄉梓囊封屢上彌執養志之  
求宸翰載頒特畀專城之養山川不改閭井如歸指丘  
水之舊游動旌旗之喜色某昔嘗瞻望今復親依賈誼  
奏篇叨與刪修之末齊風報政佇觀課最之先禱頌攸  
深叙陳曷既

賀胡守啟

伏審顯陞內閣中摠邊城逖聽慶音良深抃悃伏惟某  
官懷才瞻敏稟質忠純早馳當世之聲猷果契有為之  
事業虎韜豹畧師行樽俎之間鐵甕湯池勢逼氍毹之  
外遠夷嚮化邊境乂安峻功因儒帥之謀寵數協士林  
之望某方修慶禮遽辱謙滕遐企麾幢第勤心目

賀游守啟

十行鳳詔起謝傅于東山千里虎符屈召公於南國何  
幸儒業之復用庶幾民瘼之必瘳道之將行喜而不寐

恭惟某官天民先覺王國耆英隱然實大以聲宏凜若  
芒寒而色正高明之學孟荀真王者之師康濟之功伊  
傅乃聖人之耦早逢熙運徧歷華途大節堂堂不為雪  
霜而改操丹衷皎皎殆與日月以爭光中心不動於一  
毫外物何憂於三黜顧陞辭之已久注宸眷以彌隆果  
奉綸言亟分侯服矧楚尾吳頭之地據閩商粵賈之衝  
觀閭鱗差江山秀列凡領承宣之寄無非偉傑之才帝  
曰汝諧卿為朕往先聲所至草木已知其威名和氣頓

田桃李爭妍於春色擁雙旌而肅引騰五袴以歡謡岳  
牧止用於詞人遠邁唐朝之故事郡守每入為宰相行  
看漢札之新頒某遠寓邊陲欣聞郵命願掃門而莫及  
悵賀厦以無階五馬贊書可慶人生之貴雙魚委質輒  
修堂下之恭慶抃交孚敷宣罔既

賀梁守啟

孫仲並

四海聲名夙著儒宗之望一時人物獨高政本之科方  
資共理之求允屬承流之寄恭惟某官勞謙下士居簡

臨民明哲王之蓋臣豈弟古之循吏擁東方之騎已大  
慰于遐瞻憇南國之棠宜少留於高躅睹二天之風采  
溢千里之春聲自憐投老之餘獲在容光之地繫大賢  
之高致奚棄先游廁賀客之下僚自慚末習

賀張守啟

范西叔

竦聞譽命光奉恩綸解印陝郊作藩楚服伏深慶慰恭  
惟某官學通今古識際天人遇事敢為直躬無愧風生  
芸閣皆名理之談鶚立霜臺有忠義之色恥遂容身之



計勇為去國之行列郡澄清蕭然虛囿斯民饒富浩  
若流泉俯臨大國之封遽報暮年之政益隆宸眷更守  
名邦浮鷗清湘聊適江湖之興懷鉛紫禁行追翰墨之  
遊某猥以塵蹤竊攀英躅石渠舊事歎從橐之飄零銅虎  
優恩期望風於彷彿方謀命駕先辱飛騰佇申伏謁之  
勤少慰叙陳之願

賀韓守啟

葉之望

黼座疏恩朱幡出鎮輟元侯之千乘布溫詔之十行人

望翕歸王靈甚渥竊以閩邦勝壤建水上游自昔揚州  
之故區上直星紀之分野江山如畫列武夷之洞天地  
望最雄控東甌之襟帶密邇九重之行殿宛同三輔之  
陪京自非五百年名世之流曷稱二千石惟良之選恭  
惟判府左司直閣智周物表道覺民先吏部文章擅二  
百年之聲價荊州風采過一萬戶之侯封傳家獨擅于  
典刑入仕早符于際遇險夷歷試中外踐更旋躋宰屬  
之榮繼寓秘圖之直持札簪筆盍處禁嚴擁蠹建牙暫

司屏翰蓋聖朝之重外本守臣之得人先聲初下于斗  
南和氣頓回于閩嶠京師蒙福已觀郭伋之行朝廷深  
知即慶弱翁之召某劔津賤士錦里負丞慕義何啻于  
十年庇身幸佐于百里槐松對植敢驚除水之鳴荊棘  
雖微亦冀慶雲之覆恢台應候景物漸舒仰旌旆之載  
途擁休祥而來舍胸懷所蘊筆舌難窮

賀宋守啟

伏審光膺鳳詔榮剖虎符見一人眷倚之隆為千里生

靈之福吏民交慶遐邇均歡恭惟判府朝議神清氣和  
量洪德厚儼日角珠庭之人物傳瓊盃玉笋之家聲早  
拔周行茂膺異眷踐更中外之久備見設施之良分麾  
已報于政成上計亟聞于詔可荐領承宣之寄用分宵  
旰之憂浙水雲愁人結去思之恨閩山風動衆興來暮  
之謠將矚精騎之戒塗竊恐絲綸之促召八綴鵷鴻之  
列即依日月之光某濫藉官聯素餐屬邑託二天之庇  
望有甚于雲霓賀大厦之成情豈勝于燕雀

賀程守啟

朱顯叔

輟從祠部更殿侯藩上知甚明物論斯快凡賴帡幪之  
庇尤深抃躍之誠仰惟判府徽猷道德淵源文章宗伯  
廻狂瀾於學海聳巨幹於儒林偉程氏之家聲為伊川  
之名世典刑具在風采凜然雖擁纛建牙易司屏翰而  
持荷簪筆將處禁嚴藹輿頌之甚休慶邦人之攸繫某  
江湖冷族章句腐儒側聆綸綍之頒屬在部封之末將  
詣望履欣遂執鞭願伸拜下之儀式慰仰高之儔諒旌

旄之所指宜神物以來持倍擁殊祥允符瞻詠

賀葉守啟

許仲賢

暫違省掖出守淮壖阻奉訊音積馳繫想伏惟某官富  
有道學奮為人文直前疑危自信剛大三已而無愠色  
是有子文之仁四十而不動心真得孟軻之勇行聽嚴  
召用副衆言某先沐芳滕第深愧感

賀王守啟

陳師孟

睿主勤賢思得人而共理寧侯體國即拜命以承流久

傾慕藺之情茲快識韓之願恭惟判府提舉中大器資  
博大材術優長浴德澡身外絕可磨之玷涖官行法中  
懷以直之繩將使指以觀風肅豪強而斂迹宸衷簡在  
儒術盛行當運開千載之期享人生五馬之貴才應鳳  
凰之瑞名彰鷟鷖之行尚枉朱輪佇翻紅藥某磨鉛策  
鈍竊食偷榮隱居以求幾欲栖蹤於少室為貧而仕頗  
慚尸位於藍田何期苦節之踈頑獲倚甘棠之蔭樾欣  
然有喜言之不文虔修燕賀之誠僣遂鳬趨之幸瞻依

政切敷叙莫窮

賀薛守啟

蒲子復

伏審光膺帝渥寵寄侯藩乃江浦之奧區實京華之近  
地自頒綸綍喜溢搢紳恭惟判府右司德望俱隆才華  
甚茂夙抱孔周之學出逢堯舜之時簡在淵衷屢躋顯  
擢優居星省徊翔久歷於歲時出奉虎符平理尚資于  
德政用副九重之意計安千里之民使無歎息愁怨之  
聲宜有和易優柔之化但郎官上應列宿咸仰循良然



刺史入為三公佇觀宸顯某自惟寒賤久辱眷知聞除  
命之遽傳激愚衷而倍喜敢憑竿牘輒伸燕賀之私遐  
企門牆徒極斗山之仰其為贊詠罔罄敷宣

賀曾守啟

張守道

屈臨藩方小試才具視印章于剛日下條教於遺民父  
老交歡士友同慶恭惟某官才華世濟學術家傳博涉  
古今久擅搢紳之譽踐揚中外且膺廊廟之知未究遠  
猷姑從祿仕雖淮西之偏郡實江左之上流疆場牧寧

政假綏懷之畧瘡痍未復尤資惠愛之思想耕桑之業  
俱還而襦袴之謠並起班春擲簡追健筆于東坡瀝酒  
叩舷弔英姿于赤壁一洗積年之沉滯未妨他日之騫  
翔佇治最之上聞即華途而入踐某久叨事契每嘆淹  
回逖聞下車殆將折屐莫遂門闌之慶首貽竿牘之榮  
欣幸之私敷言罔既

賀梁守啟

趙承之

顯膺成渙易鎮近藩左史記言暫輟論思之益大邦維

翰實分憂顧之勞盛德所加傳聞相慶恭維某官遠猷  
經世雅望映時上林子虛秀發岷峨之氣春秋洪範相  
傳父子之書方公道之恢張首衆賢而召見紬文虎觀  
遍觀四部之新載筆螭坳曲盡三長之妙密勿公言之  
地從容侍從之班敢意江湖獲瞻鵷鷺淮陽暫屈在汲  
黯以何傷馮翊既更抑望之之將用矧乃賜環之意兆  
茲換節之榮坐使憩棠不容暖席某晚生牆面孤宦陸  
沉想前輩之風流莫傳師友誦名臣之事業殆若神人

乃當大府之開猥廁附庸之列行其少學雖莫逮于絃歌奉我寬條尚不專于刀筆

治中

賀王倅啟

虞智周

伏審光膺渙號榮貳雄藩涓日之剛已諧洗視順風而請深切依歸恭惟某官韻宇儲崧高文倒峽智能周天下之事書不工紙上之言人碧海掣鯨鯢其已久矣上青雲跨騄駘尚且遲之姑倅貳於郡符已喧騰于朝望

山川改觀風月平分千里題輿寧久屈屏星之駕九重  
側席將促近北辰之居不待突黔即膺泥紫某質顓性  
室才散慮踈偶濫竊于儒科顧繆當於邑寄傷多掣錦  
冥有索塗才已盡于一同考書下下仁鼎依于半刺喜  
溢津津影欲避於雁行屢敢稽於燕賀屬緣掌綴莫獲  
親承貢粢禮于緘滕顧慚柔訥遡餘光于墻仞第劇戰  
兢冬律向邁寒光尤力敢勾節宣之喜茂迎戩穀之繁  
心曲所期筆端奚竟

賀陳倅啟

虞智周

伏審祇承休命榮貳雄藩千里比休一時鼓舞恭惟某  
官行方以正德粹而溫精窮學問之淵源自立文章之  
機杼酬酢世變以時中之義渾融天理於日用之常首  
善京師夙光璧水同流王化來駕屏星姑試題輿即膺  
前席居之無幾暫遠城南尺五之天進也未央將到達  
萊方丈之地某質顓性室才散慮踈偶濫竊于儒科顧  
繆當於邑寄歲縻月費甚慚鼠竊于太倉晨入暮歸第

見驅馳於空隙雖弊筋力何補毫毛會逢賢德之鼎來  
尤慶微蹤之有託何其幸也將披宿霧于公堂又有甚  
焉願借餘波於君地寸心所蘊尺牘奚周

賀龔倅啟

晁子正

紫詔疏恩倚諸老先生之重黃堂貳政膺治中從事之  
榮凡庇餘光舉深抃素竊以朱幡皂蓋承宣雖寄於專  
城泥軼緹屏關決是繁于別駕矧邛山之舊地號蜀土  
之名區筦榷浩繁簿書紛委不有耆英之望孰資政理

之良恭惟某官道會性天學優聖域圓明妙湛契古佛  
不傳之心變通周流窮伏羲未畫之易踐揚廡仕謁著  
能聲暫淹持橐之榮茂對題輿之寵濁賢清聖舊聞隱  
吏之風流白叟黃童尚識故侯之面目佇瞻旌旆仰託  
帡幪某庇職無能以身得察莫從候吏躬負弩於前驅  
行與諸生俱執經于函丈其為欣抃罔究編摩

賀魏倅啟

周行可

疏恩玉殿半刺金城邸報所傳輿情惟愜况帡幪之所



逮尤鼓舞以知歸恭惟某官器畧宏深風猷秀整凡周旋當世之務皆從容適時之才當宁眷隆欲共濟中興之舉題輿望重姑試觀闕決之能歷數前世之英雄多因此途而施設矧茲潮郡自昔瀛州嘉禾宛然韓昌黎之舊德豐碑屹若陳文惠之高風允藉鴻才庶攀懿躅穎方自露展驥足于海隅席想未溫來鳳書於日下顧茲冗品幸屬鈞陶特遂鳬趨預深雀躍

賀王倅啟

楊成功

芝封紫誥久傳半刺之除魚置尺書莫展一言之賀况  
江山之有間望履烏以無因仰德滋深撫躬積愧恭惟  
某官識該今古學貫天人早空蟾窟之枝旋浴鳳池之  
浪盤根錯節知投刃以皆虛聳壑昂霄遂干雲而直上  
即見題輿之譽遠追康海之功計未席溫已聞詔入某  
鼠窮易見鉛鈍奚堪昔已幸于登龍行復欣於附驥謹  
同百姓再興來暮之謠更冀一身永賴存全之惠春規  
漸晚德宇負還伏祈上為朝家善綏福履其為頌詠曷

聲敷陳

賀饒倅啟

李知幾

仰膺宸檢半刺侯藩惟茲舉國之公評允屬題輿之重  
望先聲所暨衆志攸歸恭惟某官學術淵源天資蘊藉  
聲名聳搢紳先生之觀議論有君子長者之風當年芹  
泮之師儒漸摩有素此日常郊之別乘關決尤長坐席  
未溫召函已促某鰕生何幸鴻庇是依將遂鳬趨尤深  
雀躍

賀張倅啟

鄭厚

仰膺成命半刺巨藩贊美政於中和試長才於闕決先  
聲所暨公議攸歸恭惟某官學有家風才推國器用無  
施而不可治所至而有聲望重題輿試展夷途之驥足  
眷隆當宁行陪禁掖之駕行自顧萍蹤行瞻芝宇

賀李倅啟

何子固

公朝重外聖主憂民輟樞府之要津貳海濱之遠郡先  
聲所被闔境交歡伏惟某官學術深醇文詞典麗詩書

傳美夙高翰苑之風華萼連芳繼擢詞科之貴奮身學  
省提榘道山涵器業以加修養聲名而益廣顧時方右  
武徒誇述作之工雖地峻本兵猶滯編摩之職謂當迅  
用更此外遷諒無暖席之安即被賜環之寵某榮同解  
褐進類簸糠從伯仲之游幸朝鸞之接武申子孫之契  
喜別乘以同僚將藉手于剗裁庶偷安于嘯諾米鹽不  
給老子之興無多風月何殊賢者之樂有待其為忻幸  
難具敷陳

賀諸葛倅啟

熊子復

伏審中䟽一札外贊六條以卧龍宗派之華由展驥仕途之捷雖仲舉明經別駕未愜壯懷然武夷陰護曾孫仰駐仙境恭惟通判寺丞世傳令德身負奇才鄉士升司徒掇褒然之舉首國子入太學掀藉甚之能名屬睿智之有臨憫文獻之不足使謁者而求遺書于天下得先人所藏古文於壁中悉送上官皆充秘府既助興于縉典宜祇奉於渥恩驟逢特達之知早免徒勞之任入

聯棘寺法推廷尉之平出貳棠郊政持刺史之半龍檢  
即聽于嚴召鷄行更覩於榮登某鄭校小生梁園下客  
栖栖者非為佞也誠慕是邦之賢大夫休休焉實能容  
之願進吾黨之狂小子

賀連倅啟

鄭元嘉

伏審雲外鳳書光被九重之渥湖陰泥軾榮分半刺之  
權涓日頒條順時宣化伏惟慶慰恭以某官先生材猷  
敏幼聞望高華秀氣逼人飄逸一枝之桂冲懷洒落汪

洋萬頃之波允矣棟梁之材溫其瑚璉之器茂承睿眷  
踐歷要津姑藉盛名暫題輿于方面推揚茂績終持橐  
于禁林德業定期于遠圖功名蓋出其餘事某祖本移  
監身生益陽徒知誦詩而讀書未能出囊而脫穎敢言  
萍跡濫玷宗盟欣承視印之初倍切懼心之積賓墀稱  
賀已瞻大厦之成黌舍偷生全恃慶雲之庇

賀王倅啟

李子西

伏審詔下日邇遯聽疏恩之渥邦臨湖右咸瞻半刺之



榮光耀摺紳懼傳道路恭惟通判學士行應人傑才稱  
世師清節照時注玉壺之沆瀣高文華國垂金薤之琳  
瑯暫淹展驥之馳終副佩刀之贈無施不可所至有聲  
恐未及于下車已別聞于出綽某顧慚樗質繆綰銅章  
比從邸報之傳亟動心旌之喜晉卿愛日將遂借於恩  
光少室景星行可期于快覩江鄉歲晏門館天遥倍希  
道善之宜益厚穆清之眷茲焉抃頌無以喻云

賀龔倅啟

史鴻漸

伏審制出中宸通虎符而共守權居半刺展驥足以猶  
淹除日初傳輿情胥悅恭惟府判學士心澄玉海學富  
金籙大策高文昔貴都城之紙仁恩善政今陰召伯之  
棠尚虛持橐之班俯就題輿之任未溫坐席行趣歸裝  
某樗櫟散材蓬蒿倦翼識迷朱墨敢辭薄領之勞目極  
雲天即仰帡幪之蔭迹阻匏瓜之繫心馳燕雀之誠忻  
喜載懷名言莫既

賀范倅啟

費原父

伏以芝緘疏寵榮膺別乘之除泥軼臨民爰貳价藩之  
重傳聞攸暨忻懌惟均伏惟通判學士閱識會元英猷  
體遠早飛英于桂籍旋振武于花封物情曲行而周知  
吏事彌精于緣飾雖兼長之屢試亦素蘊之未攄刺史  
題輿俯慰一圻之望侍臣持橐行陪三接之榮某仕也  
為貧丞哉何補幸瓜期之甫及望宇蔭以猶賒歲律崢  
嶸物華晚願謹節宣之理益崇頤衛之宜忻頌之私  
敷陳奚究

賀虞倅啟

崔子淵

中䟽一札外贊六條泥軾來臨動溪山之秀氣譙城相  
慶載道路之歡聲伏惟某官氣宇靜深性資渾厚且飛  
敷於華旦荐騰踏於夷途別駕辟於陳蕃暫屈雲霄之  
步宣室思于賈誼佇承雨露之恩某自昔聞風尚遲識  
面將繡衣之直指甚愧非才啟白絹之斜封並欽厚意  
賀張倅啟

熊子復

伏審䟽榮宸檢關決藩條喜催龍劔之還愧枉魚緘之

貺竊以廬陵送行於北固詠江山之最嘉眉陽得侶于  
西湖謂風月之分破恭惟通判朝議受才膺敏造理精  
微波瀾文自老成緣飾政皆儒雅題仲舉之座方著於  
令名賜建武之書即膺于嚴召某猥叨郡寄稔聽鄉評  
所求乎先施未能週勤妙語匪報也永以為好用贄鄙  
詞

賀胡倅啟

周茂卿

伏審光膺宸檢榮貳藩條方閱次以及期即涓剛而赴

治凡居按察預切欣愉恭惟府判判院學有淵源文知  
體要自偶休明之運已深簡在之知錯節盤根迎刃而  
解良金美玉為世所珍覺富貴之逼人付功名于餘事  
乃眷梅仙之境暫承竹使之符治優贊于循良政每資  
于闕決預慶偏州之蒙福咸欣半刺之得賢然州縣徒  
勞人寧久淹於外補而台相先遠業行即慶于褒除某  
賦性凡庸受材鬼瑣雖便便而惟謹徒斷斷以無他濫  
綴官曹叨為邑佐自始聞于成績第倍切於歡悰燕集

雕梁已有依棲之便馬居華廐尚希矚睠之私願伸拜  
下之儀式慰仰高之僚諒旌麾之所指宜神物以來持  
倍擁殊祥允符瞻詠

賀王倅啟

朱廷珪

榮貳使車光分鄰境假符刺舉實表瑞于郡寮贊職蕃  
宣迺同流於王化風靡所暨驩誦載颺伏惟欣抃恭以  
某官植德粹溫受才明敏譽高華胄惟有之是以似之  
業紹真儒在賢者識其大者聊攄底蘊式著翺翔允敷

惠于一方即飛英于百越肯從別乘無煩題仲舉之輿  
使處治中行見展士元之驥未遑煖席應有除書某叨  
守邊陲匪遙賓祀木就繩而金就礪阻切奉于良規石  
韞玉而水懷珠願少希於餘潤瞻依有素取述奚殫

賀韓倅啟

趙承之

光膺睿制榮貳雄藩屈遠步于再臨仕雖圖舊聞餘風  
而相慶命則維新恭惟某官厚德在人高名映世青箱  
肄業有七世五公之傳黃卷策勲必三代兩漢之作早



注虛懷之眷屢宣實試之勞乃以別車存蒞名郡恩波  
所浸江湖猶記於昔游遺愛宛存父老能談於故事雖  
用賢之未盡抑重外以為深坐觀海沂之康立還宣室  
之召某塵埋俗駕景仰下風濫陪墨綬之行獲接屏星  
之軌靈河布潤尚沾九里之餘大厦告成與有千間之  
慶

帥司屬官

賀王叅議啟

洪廷卿

伏審中䟽華渚外賛雄藩徒御鼎來猶未披于樂霧絨  
縢驟至乃先拜于郇雲士林交歸帥閫增重恭惟叅議  
直閣受才傑異造理精微故家台輔之榮世臣非謂喬  
木早歲甲科之擢學者仰如泰山共知冀北之空猶嘆  
周南之滯閩包七聚率總十連佐方伯而領諸侯暫平  
婉畫媚天子而維吉士佇侍禁途某猥被使令獲聯執  
事切慰仰高之久尤欣借潤之多

賀黃叅議啟

林少頴

顯奉宸俞密叅帥畫聞鳴騶之載路覺制閫之增輝恭  
惟某官識度高明器資宏廓早被聖神之眷屢更中外  
之勞茲膺簡迪之求來助撫綏之政庾公之在幕府實  
為王儉之光昌黎之從佐書姑以中立之重佇聞環召  
入踐禁途某久仰高風忻聆新命貽書見及夫何自牧  
之謙修謁未遑第深不寐之喜

賀謝叅議啟

林少穎

疏恩外閫密叅籌畫之奇抗轡修塗行遂瞻依之幸先

聲所暨輿誦惟均恭惟某官沉静有謀詳明知務無施  
不可用屢試于盤根所至有聲固已恢于餘地尚淹時  
望來贊帥藩暫以優游帷幄之中畧具期會簿書之事益  
觀涵養佇即召除顧馳慶之未遑辱飛緘之先逮載惟  
謙眷良激感悰秋律方深涼颼浸肅冀慎寢興之節式  
符企詠之私

賀劉叅議啟

林少穎

肅奉宸恩榮叅帥路先聲所暨輿論攸歸伏惟慰悃恭

以參議智通幽顯識洞古今高名聳乎搢紳遠謀見于樽俎顧聞風之已久嗟識面以何遲方欲修誠遽蒙捐翰驅馳原隰尚有阻于披雲引領旌麾即當求于發藥益增傾向罔既敷宣



五百家播芳大全文粹卷二十三

欽定四庫全書

集部

五百家播芳大全文粹卷二十四

詳校官編修<sub>臣</sub>謝振定

助教<sub>臣</sub>常循覆勘

總校官編修<sub>臣</sub>王燕緒

校對官中書<sub>臣</sub>葉蘭

謄錄監生<sub>臣</sub>張護

欽定四庫全書

五百家播芳大全文粹卷二十四

宋 魏齊賢

葉 棻同輯

賀啓

諸司屬官

主管 運幹  
檢法 總幹  
提幹

賀漕司趙主管啓

周必舉

伏審疏榮中辰參畫外臺四乘鼎來方期披于樂霧雙

絨寵及乃預捧於郇雲恭惟主管朝議興學根經雅辭  
貫道內剛方而不撓外廉靜以無華朝路聯輝有鵠原  
之難弟世科擢秀生鳳穴之好兒卓有令名蔚為盛事  
回翔滋久蘊藉彌深輓粟飛芻聊贊木牛之運懷鉛抱  
槧即陪金馬之游某猥假守麾獲陪帥屬式慰仰高之  
久良欣借潤之多

賀漕司王主管啓

宋茂德

伏審光膺宸寵榮贊漕儲視篆云初聞風增忭恭惟某



官器識宏遠襟度坦夷家傳高談道之風流世望仰夢刀  
之威重符彩已標於世瑞聲稱夙擅於月評挺碧梧翠  
竹之材見璞玉渾金之器外臺參畫雖未究于設施中  
宸求賢當別膺於除召某猥塵仕路叨貳藩條聞台旃  
之昂來揺心旌而倍喜首辱飛文之寵益銘謙德之光

賀漕司周帳管啓

張德輿

伏審䟽恩中禁贊畫外臺捐修敬之未遑迺飛文之先  
辱恭惟某官詞林擢秀藝圃騰芳家聲高赤壁之勲人

物重青雲之器識高明而自得量恢廓以有容踐揚蜚  
仕路之英蘊藉聳朝紳之望暫淹漕幕雖未究于設施  
過奉宸綸當別膺於超擢諒無溫席行即促裝某叨貳  
藩條不閒使事每恨聞風之久未諧披霧之因敬達柔  
緘仰謝先辱

賀漕司馬幹啓

楊子然

伏審入奉帝俞出隨使指束越裝而在道涉閩境以之  
官先聲所臨公論咸屬恭惟運幹學士神鋒映俗仙格

邁倫故家元重于典型今代獨高于文獻匪謂國之喬  
木以有世臣尚愛公之甘棠而況其子臧孫於魯必有  
後繞朝在秦豈無人從事外臺姑贊木牛之運奏言前  
席佇連金馬之班某猥以菲才謬假符守雖宦迹之新  
遇然姻黨之舊聯拆白絹之封坐驚雲翰揖紫芝之宇  
行欵風姿

賀倉司張幹啓

胡仲達

伏審疏恩中宸贊畫外臺都騎昂來將遂披於樂霧朋

絨寵寄乃預拜於郇雲恭惟提幹朝議性質靖深才資  
閎遠蔚有令望播于清時原隰皇皇暫出陪於使部省  
臺衮衮行進擢于公朝某猥布教條方親名理式副仰  
高之久良欣借潤之多惟心所懷匪面焉罄

賀憲司呂幹啓

闕名

伏審光膺宸檢叶贊憲臺望夙著于公平衆舉聞於抃  
蹈恭惟某官生資渾厚抱德醇全以大丞相流慶之賢  
佐部刺史宣風之寄分行郡國諒無濫罰之寃贊理條

章當著輔成之績廣聖主好生之德懷君子忠厚之心  
雖未究于設施已足明其惻隱圜扉鞠草行與有功西  
掖判花姑惟少待某聞風鄉也披霧邈然茲承騎使之  
鼎來首辱書函之下逮占詞叙謝涉筆奚周

賀憲司檢法啓

黃廷秀

伏審光膺宸綽榮替憲臺詳研丹筆之文益重清時之  
選見聞所暨歡抃惟均恭惟某官體被中和才周果藝  
勤勞州縣不求當世之知練習憲章多傳通儒之議比

簡平反之望出陪直指之行紙上深文快掃煩苛之弊  
毫端陰德自為富貴之符某猥以窮途將承餘映倦游  
半世方嗟舊事之空妙札五雲竊喜新知之厚

賀胡錢監啓

熊子復

伏審祇奉茂恩榮司清職東越裝而在道涉閩境以之  
官先聲既傳公望咸屬恭惟知監學士神標凝峙仙韻  
粹清飛翔蓋宜于京華留滯尚居于莞庫乃眷長安之  
錢掾實隸上林之鍾官聊發新硎豈勞游刃周圍九府

會見充盈漢札十行佇聞褒擢某猥游郡幕獲比官僚  
惟心所懷匪面焉既

賀坑治司朱幹啓

陳建中

伏審光膺宸檢榮佐臬司凡預幘幪舉增欣抃恭惟某  
官丰姿秀整器識宏深棲烏傳楊府之家聲佩印仰錦  
衣之世望風采已標於人瑞名稱夙擅于月評躋仁路  
以踐揚聳朝紳而推重鼓鑄一格式資贊畫之功凌厲  
九霄當被褒除之寵遙羽即班于鴈鷺致君宜會于風

雲某濫竊儒科叨承邑寄徒弊筋力何補毫毛自慚頑質尚資陶冶之功敢贅尺書敬布依歸之意

賀總管司王幹啓

王履道

伏審中宸疏恩外臺贊畫有識交頌不謀同辭恭惟總幹朝議古學精深天才挺特議論得古人之醇正文章追作者之規模出自相門雅為人表荐更膺仕藹著休稱家藏三萬之牙籤已擅書林之富世有千金之玉海更韜儒席之珍暫陪幕府之宴談即遙朝簪之班列某



根叨聯事將幸通辭懷蕪葭倚玉之慙願希借譽馬瓦礫成金之賜當藉包荒頌詠之私敷宣罔既

州官

教授

簽判

察判

察推

知錄

司理

司法

司戶

賀陳教授啓

王志夫

順流而行東海曾獲望洋挂笏而對西山將聞致爽遼茲  
馳想遽辱貽書伏惟某官驚座雄文卧棲逸韻不事一  
室亶為有用之才將出六奇以佐太平之運暫采芹于  
絳帳即分燭於青藜某碌碌尸官拳拳慕義念旃蒙作

噩之歲曾識面于荊州而單闕執徐之年復同僚于士  
會永言欣幸莫罄敷陳

賀徐教授啓

周少淵

分職儒林下車鄉校高名夙著多士相歡自昔人昧五  
常之原而後世無三代之學大道殫殘于秦法衆言殽  
亂於漢儒以公羊為賣餅家益譏淺俚謂太玄可覆醬  
瓿尤病支離國家崇飾儒師發明道德排異端之戕賊  
歸妙理之淵源必先因性而治身然後事君而成物故

于教養益重選掄伏惟某官德性靜深天材秀擢非先  
王之言不道以大人之學自修將趨步於紫垣暫棲遲  
於泮水金口木舌一坐盡傾白日青天衆人皆仰鳴絃  
盈耳投屨滿門從善若登並席幾四科之列聞風而作  
擔簦多千里之行禮義相磨英豪輩出將見東徐雅俗  
共陶闕里之餘風貞觀名卿半出河汾之高弟行膺嚴  
召別踐要津慕義素深瞻承良幸

賀王教授啓

王叔珪

槐市聞風未識元魯山之眉宇蘭陵取友欣傳鄭博士  
之才名瞻際非遙夤緣甚幸恭惟某官莊鵬奮翮崑玉  
凝姿蜚學海之英拔穎每先於多士廣詞場之勇奪標  
迨遍于諸科暫分泮水之芹即造昕庭之鷺某濫丞支  
郡無補縣官愛莫助之方深憂于王事吾知晚矣將得  
見於善人矧先十部之臨益重寸心之感

賀陳教授啓

鄭之望

千室之邑使為宰方虞製錦之傷一卷之書必有師喜

有樞衣之幸豈特陪銀袍而鼓勇且將觀璧水之增輝  
恭惟某官學無不通文皆自得辭源浩瀚一時爭慕其  
才筆陣縱橫諸公無出其右游戲示工於三昧笑談連  
掇於兩科煥乎經緯之雄詞喧然膾炙於衆口聊居領  
袖未究規模招諸生立而誨之未見三鱣之效祉賀先  
生自此陞矣佇觀一柱之擎天某自愧塵埃日縻丹墨  
未能擁被聽朝衙之鼓徒勞戴星肩夜出之輿誓一洗  
於胸襟冀飽聆於謦欬且小以成小大以成大學者孰

不傾心然見所未見聞所未聞小子願安承教

賀黃教授啓

闕名

伏審荐擢魏科尚淹重席當多士應賢書之歲正先生  
臨侯泮之時伏惟某官擢秀橋門飛英藝圃眷二狀元  
之鄉曲素懋斯文繫一真儒之範模米廸後進欲試青  
雲之步姑橫絳帳之經士雖得有道而正焉上念何相  
見之晚也某顧慚假守獲並英游佇聆絃誦之興一洗  
簿書之冗茲為幸會將事從容

頌游教官啓

張欽夫

疏恩北闕分教南邦出御史之名門先聲已著羣諸生  
於泮水講習方嚴伏惟某官文采飛英豈弟從政蓄於  
平素既以致遠為心見於施為常有躬行之實念此都  
會夙多俊良正資教養之功庸底作成之盛識其大者  
豈誦說云乎哉何以告之亦仁義而已矣某一識風宇  
三易歲華欣聞徒御之臨首拜賤詞之辱自慚短翰曷  
報塵渠即聽令名少慰孤陋

賀陳教授啓

熊子復

伏以神標挺出夙異欵於風姿仙馭鼎來顧枉貽於雲翰審韶光之駘蕩諒行色之雍容恭惟教授正字奧學根經懿文貫道才博通於世務譽卓冠於時髦傳道魯侯之泮宮未妨遠業校文老氏之藏室即被新除某猥假一麾過勤雙牘寸抱第增於搖曳尺緘聊附於回翔

賀鄭簽判狀元啓

楊廷秀

幕府粹清不妨尋東湖西山之勝江城疎遠未應屈石



渠天祿之英或謂其羈離而愁思夫豈緣中外而欣厭  
恭惟某官以海內寡二之學收天下第一之科舉首于  
大夫之中蓋今日之董相誦言諸宦寺之輩乃登第之  
劉蕢奏篇一傳紙價十倍何上意驟用而不可猶舊章  
相襲而或拘翩然斜飛來此外補民豈無瘼正恐非在  
位之敢陳公於是時力行其所言而孰禦必能條白以  
次罷行上裨仁賢之主人下慰歡呼之父老六月之息  
鵬背未必其然十年而到鳳池故應未晚某自知其拙

世指其狂少也勃乎欲竟造古人之處今而老矣聊坐  
觀半世之非周章折腰瑟縮掣肘宦情寂歷冷于楓落  
之江歸夢紛紜空遶菊荒之徑敢圖貧病之末路焉依  
蔭映之餘光

賀葛簽判啓

周元吉

伏審首充賓幕光贊守麾九里之潤旁霑方依芘賴五  
朶之雲下賁尤認謙冲屬徒御之遽臨顧綴滕之未具  
恭惟簽判朝議神標凝峙仙韻粹清仲尼顏閔之傳妙

臻名理太史莊騷之作深達典刑氣節凜然聲華藉甚  
持綱紀於上郡暫屈壯圖照步武於中朝佇膺殊渥某  
浸鄰衰境猥試冷曹直諒多聞既仰淵源之學中和樂  
職尚賡標準之詩

賀李簽判啓

胡子才

伏審光被恩章寵遷郎秩曾未馳於柔牘乃先枉于榮  
緘厚意所隆感懷殊劇恭惟某官風徽端雅襟誼粹明  
早揚歷於宦游固聳傾于輿論郡條關決嘗歌敏贍之

才賓幕參謀重屈優長之畫即傳顯詔別陟要途惟清履之順綏庶真祈之默契

賀詹察判啓

闕名

屈從郎選來佐郡條慨吏役之繁興似非所處想儒者之緣飾終自不同恭惟某官學窮淵源器有防檢早策榮于昭代思騰茂於要津追討平生已宜在金馬石渠之地何其萬里尚能為紅蓮綠水之游雖雅量固已安之要明論不為悞也某老且隱去貧為祿來雖客嘲揚

子雲之窮自期不解於魯得柳下惠而友孰患無從願  
勤跋涉之勞少慰僕瞻之意

賀石察判啓

李西美

伏審選自銓曹隸於藩幕首贊二天之制先蒙十部之  
貽仰認謙冲俯憐遲鈍伏惟察判朝議英姿邁俗清望  
映時嗣文獻於故家追典刑於前輩聲華籍甚氣宇浩  
然大府之會才能暫煩小試本朝之進英雋即被新除  
某猥貳郡條幸私僚比愧未通於訊牘辱先枉於誨函

惟心所期匪面焉既

賀余察推啓

石敏若

伏審䟽檢宸廷贊條藩幕青天雲霧夙景仰於英資綠  
水芙蓉暫淹留於逸步邦人胥慶僚友交歡恭惟察判  
朝議氣節凜然聲華籍甚淵源師友學已得于聖傳波  
瀾老成文更追於古作回翔甚久恬養彌高眷大府之  
務繁藉元寮之才敏紛綸殊狀孰逃照水之犀寥廓亨  
衢不礙冲霄之翼某猥充計掾獲附雋游蔚乎相輝方

仰翩翩之譽退然無用自憐碌碌之蹤

賀楊察推啓

虞元老

伏審宸廷錫命藩府贊條凡與見聞舉增欣抃恭惟某  
官襟靈凝遠器度端方得岷峨之秀為最多養江海之  
源而有本身昔居于韋布學已務於經綸果以讜言觀  
蒙睿擢今既同孫夢得用文詞而取甲科終必如范景  
文聳風節以名天下自是朝廷之選寧容幕府之淹綠  
水紅蓮聊借途於鄉社青天白日行振翼於雲衢某比

屬還轅幸承傾蓋良遲何取猥見推同道之先緘翰遠  
貽更俯執下官之禮得見情文之厚豈非聲氣之求

賀潘知錄啓

鄭伯厚

仰膺宸檢來糾邦聯遂忝同僚甚諧公論伏惟某官端  
方器局練達材猷暫領袖於郡曹行襟裾於省闈顧惟  
朽質獲覩清標未遑尺牘之修先辱駢函之貺

賀馮司理啓

熊子復

伏審天府簡僚高才作掾協贊專城之治允資折獄之



良先聲既傳公望咸屬恭惟司理學士才資閑遠氣質  
靖深妙臻師友之淵源夙振文章之光艷自言挺出宜  
踐要津豈謂晚成見推大器嚮已淹於征筦茲猶試於  
理曹雖屈壯圖寔階臚仕某稷縻郡祿獲比官睬方德  
庇之是依枉誨函之先逮銘感惟劇頌嘆曷勝

賀陳司法啓

鄭子履

伏審顯膺異數榮領決曹留心丹筆之文振迹青雲之  
路見聞所逮欣抃惟均恭惟某官襟度坦夷器識宏遠

秀毓珠星之間氣家傳玉几之遺芳刃恢恢而有餘事  
多多之益辦藩條小試試觀詳讞之功剡牘交飛行有  
薦揚之寵某棲遲薄宦偃蹇餘生莫承蘊藉之風久贊  
講聞之日濯纓而起自慙棲枳之香歛板而趨幸際詠  
梅之遜其為欣幸莫既敷陳

賀鄧司戶啓

陳阜卿

伏審擬自銓漕掾于潛府千里實繫于版籍庸有贊裨  
一時並萃于輩流卓為魁傑先聲所至公論皆歸恭惟

司戶學士與學根經懿文貫道爭鋒文陣已高擬於魏  
我發軔仕途宜大施于霹靂此殆哲人之細事亦非俗  
吏之能為編郭丹之事於黃堂庶為永式薦寶章之名  
于東觀即有新除某久矣仰高茲焉借潤顧未遑於馳  
牘迺先沐于飛函

縣官

宰丞  
簿尉

賀許宰啓

陳仲思

光膺芝檢榮撫花封凡藉帡幪孰不抃蹈恭惟某官以

太嶽之後繼箕山之高堂堂乎天下節義之閑皎皎乎  
屏間月旦之目詩成白也無敵筆落潮乎通神父子聯  
榮無畝向異同之論弟兄接武有機雲俊爽之才茲暫  
試于牛刀誠未展于騏足朝歌地隘器寧畏於蟠根彭  
澤春回門遂青於植柳膽遽寒于猾吏氣皆壯於良民  
政號神明手驚霹靂狗偷鼠竊望風而斂迹者何多雁  
集鳬趨開口而待哺者皆是陽春有脚冰鑑無私回千  
室以熙熙昭羣心而凜凜諒未溫席即膺召環某農圃

遺民部封末士早受一經之訓妄希三釜之榮撫長缺  
以興歌對短檠而自勵輒懷襴刺進拜膺門雖桃李不  
言非有成蹊之意而燕雀相賀寧忘栖廈之心

賀張宰啓

張仲謨

嚴擇剛辰已諧視事輒憑柔翰用展賀儀惟豈弟之素  
聞想吏民之增喜伏惟歡慶恭以某官天資渾厚人品  
高明郡縣多所踐更名實加于上下承宣雷地剴裁姑  
試于牛刀騰踏雲霄簡注行膺于鳳詔某竊叨郡屬忝

與宗盟披晤行軒既獲據于傾嚮欣承交印得暫假于  
依棲瞻頌惟深敷宣罔既

賀李宰啓

林豈塵

桑梓相鄰未嘗有一日之雅草木同味將共事三載之  
間嗟幸會之何多慰平生之所願恭惟判縣中大儼碩  
有立超邁不羣當從諸公衮衮臺省之榮肯隨俗吏區  
區州縣之職以治蒲治鄭治單父皆試其才而曰宰曰  
尹曰大夫豈輕所任矧番禺號為劇邑于東南實倚名

藩自皇祐以來隸籍凡三萬戶由肅政而後莅官者二十人星行已及于一周雷震不聞于百里吏懷狙狡而頑悍滋甚民雖蠻洞而馴治愈難必須藉我公明斷之能然後革累年積習之弊蓋盤根可別利器在熟路宜駕輕車雙鳧正羨於喬仙一鶚當隨於禰薦某牽絲云始為吏徒勞幸君子之肯來與邑人而咸喜且仇覽枳棘烏敢忘棲鳳之稱而子游絃歌當與聞割雞之笑其為欣抃曷罄敷陳

賀袁宰啓

郭文紀

俯臨雷地已聽事于剛辰仰望雲天爰訴懷于柔翰下車甫爾騰誦翕然伏惟歡慶恭惟某官蘊藉天資淵源學海發策決科于桂籍授經傳道于芹宮姑試臨民製錦暫煩于牛刃行觀報政頒綸佇下于鳳函某下幕脩員崇閎託託嘗披承于芝宇謦欬獲聞阻趨造于花城譽依徒切

賀林宰啓

蔡叔厚



伏審䟽渥清朝承流鉅邑山川增爽共迎鳬鳥之臨風  
俗還淳暫屈牛刀之試恭惟知縣朝議規模宏遠蘊藉  
醇深粹然家學之傳籍甚士流之仰寸毫無敵一洗而  
凡馬空政妙有神四顧而全牛解某猥充郡幕獲比官  
僚都騎鼎來即遂披於樂霧雙魚寵及乃預拜于郇雲  
尺絨聊附于回翔寸抱第增於搖曳

賀孟宰啓

馮元通

雷地承宣濟恩威於此日雲天披覩慰想慕於平生吾

道有光斯民何幸恭惟某官天資蘊藉學術淵源才華  
以取科名儒雅以飾吏治委蛇仕路剝裁姑試於牛刀  
洋溢教聲拔擢行頒于鳳檢顧惟陋質曾際英標倥忽  
塵襟誠未修于尺牘并包德量貺先辱于駢緘

賀程宰啓

鄭伯厚

行臺被命望邑承流豈弟有聞吏民胥慶恭惟某官學  
優製錦道裕鳴絃政未及于下車民已深于引領屬茲  
式郡喜得賢僚未遑尺素之修先辱長緘之貺內惟覲

愧仰認勞謙

賀戴丞啓

熊子復

伏以一行作吏緣飾皆儒雅之條再轉為丞殿最必清  
真之譽何先貽于尺牘庸少叙于寸懷恭惟知丞正字  
仙韻邃清神標凝峙氣浩然而養之以直望儼然而即  
之也溫雖六月之鵬早上于扶搖而百里之鸞嘗栖于  
枳棘高才暫屈姑臨雁鶩之行大器當升定造駕鴻之  
侶拱而俟耳誰曰不然某猥以衰齡謬當劇邑雁書雖

上許呈身集鳳之堂代者何遲尚絆迹飛鳧之舍敢嘆  
瓜期之度但欣樾蔭之依予不負丞丞負予君誠自謂  
我匪求蒙蒙求我僕願自資聲雖成文言莫盡意

賀唐丞啓

朱子淵

伏審調官銓曹貳令劇邑才尚淹于涉筆良鬱衆情睨  
先枉于飛緘仰欽厚意恭惟知丞朝議性質凝重心術  
䟽明炳然翰墨之華籍甚搢紳之望回翔浸久蘊藉彌  
優再轉為丞雖雄圖之少屈八命作牧諒華渚之方來

某頃幸承顏茲辱貽翰貢小夫之牘少寓微誠依君子之僚尚資餘比

賀鄧丞啓

虞智周

種潘縣之花慚無妙手對崔庭之竹願托濃陰矧先十部之臨益重寸心之感恭惟某官行方以峻德粹而溫景星鳳皇衆皆爭覩渾金璞玉世莫能名文士尚論古人用儒以飾吏事先聲所至豈惟清雁鶩之行精意潛通端可息風濤之害涉筆占位難淹于大手聳壑昂霄

何礙于橫飛不待爰黜即膺泥紫某尸位碌碌慕義拳  
拳願識面於荊州喜同寮于士會亶為際遇將事從容  
承負予予負承佇看搢紳之美子生孫孫生子永為仕  
契之榮

賀張主簿啓

元子俊

一行作吏脩員方愧于峨松貳政得賢庇職獲睽于棲  
枳車塵在望私分自榮台命寵光感深增懼恭惟某官  
學博以約德粹而溫翠竹碧梧外想威容之閑雅青天

白日中函氣質之清明盍攄經濟之才姑領勾稽之職  
暫閱簿書之冗勉從會計之勞蓋將託宿于蘧廬行且  
騰芳于楓陛謂百里豈大賢之路吾嘗聞之彼十行皆  
細書之文子其然矣某叨塵末路濫吹負承初考已書  
寸功無補徒有慙中之愧曾無善後之圖同舟而無異  
心庶幾共濟會績而借餘燭更賴分光

賀沈尉啓

趙德莊

伏審擬自銓曹掾于巖邑協佐鳴絃之化式資綵棒之

威先聲既傳公議允屬恭惟仙尉學士根經種學貫道  
絺章中蘊氣以浩然外騰聲而籍甚益積登于儒館猶  
須試于尉曹吏隱吳門尚晦子真之德盜奔晉國已收  
士會之功某猥服冷曹嘗欵英槩欣尚依于華蔭愧預  
枉于珍函

賀魏尉啓

張全真

山城攝事湍懷三斗之塵函使將勤有寵雙魚之貺于  
德固謙矣斯心其謂何恭惟某官韻宇儲崧彌文倒峽



力游餘地翩翩信公子之佳吏隱仙官鬱鬱豈此居之  
久佇膺奏最式大前修某伎止于斯老之將至云胡不  
喜得平生相識之人惠然肯來賴王事同寅之助所藏  
胸次未竟毫端

監官

監鎮  
監酒

監場  
監稅

賀李監鎮啓

陳師禹

伏審涓選剛辰典司清職動歡聲于井陌回爽氣於西  
山恭惟知鎮朝議仙韻冲深神機凝靜藏之以待如白

璧明珠之珍叩之則鳴若黃鐘大呂之韻粹然家學籍  
甚時名暫煩關市之征壯圖上屈行被廟堂之擢異渥  
方來進任中朝用光先正某猥居郡幕獲比官聯昨預  
拜于郇雲茲又披於樂霧甚慰仰高之久良欣借潤之  
多倍激卑悰式殫危悃

賀李監場啓

程子光

祇膺綸渙分典貨源進用所階流聞并蹈恭惟某官家  
傳素業行蹈清規久參幕府之游積有公朝之譽維茲

新命寔是中都使八政之允修用能富國則三軍之素  
飽外足強邊選任匪輕褒嘉可待某風期自昔問訊未  
遑拜藻翰以甚榮撫懦衷而增愧

賀孔監場啓

史唐老

伏審光奉茂恩肅司清職才尚淹于莞庫良鬱衆情貺  
先枉於緘滕仰欽厚意恭惟監場朝奉受才傑異造理  
精微大族本於中州華胄出於先聖粹然家學籍甚時  
名雖暫屈於壯圖諒即膺於異擢某自憐碌碌殊愧翩

翩依君子之僚尚資餘芘貢小夫之牘少寓微誠

賀翁監酒啓

張文饒

平生仰德常馳引領之情今日依人幸有盍簪之契承  
顏伊邇撫已增榮恭惟某官食德慶門飛聲仕路神助  
盃觥之句知蘊藉之有餘爾惟麴蘖之才或設施之可  
卜暫縈心計即以最聞公家之利無不為曰既富矣賢  
能之舉不待次行將見之某粗知讀書不習為吏半生  
牢落技何取乎穿楊一第間闕仕偶沾于棲棘不圖際

會獲有依承矧惟託宿之居密邇移封之地簿書餘暇  
敢忘請益之勤樽酒相從當奉論交之款

賀游監稅啓

王子禮

瞻風滋久預懷傾蓋之誠卜日鼎來行有盍簪之契具  
為厚幸寔倍常情恭惟某官德蘊中和氣全剛大涵養  
廟堂之用淹回闕市之征貨財所積以如山商賈願歸  
于其市暫勞心計即以最聞膠鬲或起于魚鹽當從此  
始文子不輕於筦庫必舉所知某粗知讀書不習為吏

凡錢穀米鹽之事未嘗過而問焉今簿書期會之榮乃由此其選也尚虞狂斐或致曠瘳有以利吾國乎已卜其鄰之富友其士之仁者幸分我燭之光

兵官

統制  
路分

賀韓統制啓

范東叔

欽奉詔書進褒師律直上邽之嚴近為中壘之光華恭惟某官才雄萬夫身履百戰稟山西之氣膺閫寄于九重破歷下之軍續家聲于千古果掃妖氛之暴亟升勇

爵之勞某久仰戎輅况依鄰寶贊喜未遑於奉記懷誠首  
辱於滕牋徒積感銘敷宣曷既

賀曹路分啓

徐南仲

長劍倚空壯矣平生之志高牙啓道歡言指日之迎未  
瞻燕領之竒姿有寵鸞經之妙墨光生暮齒庇託餘蔭  
恭惟某官千里折衝一身是膽矯矯戎輅之義英英武  
緯之雄賸馳銅柱之名暫屈金華之地蛟龍得雲雨詎  
聞鬱鬱之居貂蟬出兜鍪拭目津津之喜某叨丞一障

幸歷三時居聞騎氣之來殊激懦衷之立顧橫槊賦詩  
之逸可得而聞使磨鉛舐墨之流亦足以發

五百家播芳大全文粹卷二十四



欽定四庫全書

五百家播芳大全文粹卷二十五

宋 魏齊賢

葉 棻同輯

賀啓

試中科目

館職及第

賢良發舉

狀元

賀試中館職啓

歐陽永叔

被詔試文陞華儒館伏以某官天麟異稟廟璫至珍學

通今古之淵源言合質文之體要英躔高步羣俊夙以  
望風雄毅籠材妙選稱為得士果膺帝意入耀書林給  
札揮毫聳如牆而駭目奏篇稱善喧貴紙以傳都惟秘  
府之育賢乃熙朝之盛美優游歲課豈鉛槧之是專選  
取國材實棟梁之此出蔚然茂業奚測遠塗方懷抃躍  
之私遽辱置郵之問仰銜隆眷徒切愧誠

賀試中賢良啓

楊大年

制科攸設崇重賢良仙殿肇開是司圖史必得一時之

俊彥始膺萬乘之選掄恭惟某官蘭茝騰芳珪璋挺質  
鍾東南之秀氣爰負美材歷州縣之下僚久淹初命明  
詔遠求於茂典名卿爰覩於薦掄召對紫庭祇膺清問  
揮毫洒落見武仲之不休對策稱嗟升平津于第一翼  
日便頒于成命十洲式慶于榮登暫淹對月之曹豈測  
搏風之勢

賀試中賢良啓

楊大年

賢良之選今古攸難漢道方隆嘗聞下詔唐室之盛式

觀懸科允屬聖朝恢復前制恭惟某官文辭英發學術淵深西洛馳名早聯衡于二陸東堂較藝曾得雋于一枝旋膺聘于旂旌久淹翔于樽俎適大君之虛佇果近列以明揚祇謁紫庭恭膺清問膠西條對明三代之質文主父登延形一人之嘆息俄被絲綸之命榮歸翰墨之林公朝蓋示於育材書府聊資於假道默誦三籙雖同安世之補亡分判五花即見相如之視草方增喜頌猥沐華牋仰披藻縟之辭尤切琢磨之懇

賀試中賢良啓

闕名

設科以求特起之才發策以訪可行之論是為高選果  
得異能恭惟某官志敏以強詞嚴而瞻迹前世之事而  
博極羣書議當今之宜而常引大體及親承于聖問遂  
絕出于時髦方喜聞風遽蒙枉記仰惟謙抑之過第積  
感銘之深

賀試中賢良啓

張欽夫

發策大庭蜚英雋軌所論不苟公言允孚惟皇家設科

本取多士之用而君子從政豈為一身之謀故官無尊卑而報國則均事無大小而行志則一方觀遠業以慰輿情先辱愧于辭牋徒增深于感抱

賀試中賢良啓

朱廷瑞

膺詔造庭奏篇入第一時遴選多士榮觀竊以唐漢設科蓋以符非常之俊劉董論事亦足見有為之才國家累聖相承得一甚盛半為當世之公相或出同門之父兄自非學洞天人識貫古今發憤吐懣不懼櫻鱗之危

救溢扶衰深知調瑟之變則何以禮隆側席望重搢紳  
抗足而脫塵埃矯首而登雲漢恭惟某官明燭萬里富  
兼九流不為章句之腐儒竊鄙簿書之俗吏以天下而  
自任為衆人之不能讜論激揚歷以萬鈞而彌壯多聞  
霧霈霈之一日以如流理物有藥石之良及民如布帛  
之煖通達國體疑素宦于朝動寤上心恨相見之晚較  
然明白畧已施行顧論說之有原將陶鎔之在手某素  
惟寡學猥預持衡觀水于澗詎窮渤澥按圖求駿偶識

驂騑惠然投我以夜光何有報君之玉案載懷謙抑並  
用閎藏得之若驚常欲置之懷袖永以為好猶將示諸  
子孫感服之私誦言罔既

賀秦相子狀元及第啓

汪彥章

伏審令嗣狀元親承聖問擢冠羣英朝廷欣貢舉之得  
人天下慶公台之有子臚傳一出輿頌交馳恭惟某官  
勲塞兩儀澤流百世惟盛德神明之克相故英才似續  
以方興赫門閭之光輝新江山之氣象三年而奉詔策



固南宮進士之所同一舉而首詞科蓋東閣郎君之未有  
擅場屋敢言之氣入衣冠盛事之圖老成識面以爭先  
童稚祝身而願學雖迫于典故姑令王勃以居前然結  
此眷知行見魯公之拜後某傳聞榜帖屬守麾符滄溟  
徒看于鵬搏大廈莫陪于燕賀暑風清淑機務優游願  
求有粹之和益茂象賢之慶

賀狀元及第啓

汪彥章

蘭省登賢鼎分三傑楓宸賜第獨擅一夔首躋綸綍之

褒亟陟蓬瀛之峻朝廷著為盛事衣冠流為美談伏惟  
某官器博以周才全而敏心傳家學世代王言圖萬里  
之鵬搏廿十年之鶚屈高文大冊謂非公而誰宜為勁  
草孤標顧於我不容何病果趨明詔下應勞謙真一世  
英當萬人敵有昔山林骭體之氣無時科舉骭體之風  
卓爾不羣褒然為首名未題于雁塔身已致于麟臺力  
追前人每收舊物乃如無狀嘗佐攸司先覩大篇口誦  
手披之不厭精研奧旨心悅誠服而可知愧修謁之未

遑辱貽音之驟及脩陳至契益服下風惟韓氏之少師  
暨吾家之大父一時相與四海共傳逮至巖君亦蒙特  
薦僕之恩地公實外門子幼文章已增光于太史羊公  
事業將不愧于中郎靜言浮議之有加深激悃悃而無  
已定交伊始啓事莫窮

賀狀元及第啓

王瞻叔

臚傳上第魁冠羣英下明詔于九天恩光桂籍收大名  
于一日光映儒林伏惟歡慶恭惟某官英氣凌雲宏材

聳壑富以巾箱之學發為金石之辭卓爾異人時推于  
間出偉然大器不俟于晚成以妙齡秀發之資奉高誼  
講問之對諸老誰先于賈傳天子親擢于平津喜黌舍  
之有人掩詞場之得雋惟他日公卿之路當由此而致  
君凡一時父母之心皆向風而祝子華塗始踐遠業難  
量某久饗藿鹽更窺珠玉知洋洋于流水偶贊文衡引  
皓皓于明堂實由聖鑒擁長牋而肯顧溢陋巷于生光  
賀狀元及第啓

唱第中宸冠名上甲雖事從故典推龍首以居先而恩  
出清衷並桂林而擢秀伏惟慶慰恭惟某官文知體要  
學有淵源望久重于鄉閭聲特高于場屋屢泣荆山之  
璞知者其誰獨入豐獄之光終然莫掩擅世學以獨步  
沾皇澤以兼收有孤黃卷之心恥試紅塵之吏再鼓作  
氣一鳴驚人冕旒凝乙夜之觀軒陛首春雷之震以賢  
良三策而為舉首遂繼家風起徒步數年而取封侯更  
看晚節某傾因乏使忝預攸司設網于河偶值靈龜之

入窺斑以管詎窮文豹之奇方喜得于真才忽過蒙于  
盛禮

賀第二人及第啓

吳叔玉

賜第宸廷聯名鼎甲傳玉音而申諭藹桂籍以生光恭  
惟某官經史淹該文辭瞻蔚卓爾功名之志見于議論  
之英以資為郎欲獻相如之賦隨計詣闕果蒙漢武之  
知殊科收摘領之功絕技有中眉之恨高名始唱實居  
李孟之間故事攸拘遂處王楊之後昭聲華于白日開

塗轍于青雲某頃預攸司獲觀大對拔象犀之寶本自  
因人標龍虎之稱徒欣得士方傳盛事賜貺長牋仰謙  
德之光亨增鄙悰之感激

賀秦相孫及第啓

陳阜卿

省元較藝南宮首出譽髦之選陞華內閣特新次對之  
班逮廣漢之策名登甲科而賜第朝紳聚嘆再觀臚句  
之傳宗壺發祥交映本支之盛驩騰遐邇事冠古今恭  
惟某官當代元勲生民先覺優入聖域非堯舜之道不

敢陳化成人文雖管晏之功可復許黼黻皇猷之麗棟  
梁王室之安西被東漸治巍巍而日起前英後哲福袞  
袞以川增府縣槐棘之榮庭萃芝蘭之秀惟時洪胄誕  
毓巨儒閑德藝于晨昏奉義方于左右俯從布韋之士  
獨步翰墨之場動喜色于三台標高名于千佛蓋孟子  
近孔子之世况親見而聞知而僖公實周公之孫宜熾  
昌之俾爾矢志永延于相業輿情傾屬於師瞻某久託  
大鈞逖聞盛事上聖主得賢之頌雖愧軼材歌君子有



穀之詩徒懷胥樂

賀秦待制及第啓

闕名

南省擅場廣廷賜第延登次對通內朝侍從之班典領  
真祠兼史館刊修之職增公府之盛事聳儒林之美觀  
播之邇遐孰不欣抃恭惟某官清標秀發鉅德早成文  
章顯華國之才共推大手經術稟趨庭之教自有異聞  
一從俊造之班再擢巍巍之選洎承聖問仍擢甲科魁  
星連台曜之暉綵服映恩袍之色遂席明綸之寵亟躋

禁索之榮奉香火于琳宮不違娛侍紬圖書于石室允  
藉編摩式彰眷注之深併集便蕃之渥周公為師而召  
公為保既左提右挈而仰成顏氏之子而孔氏之孫果後  
哲前英之繼起某濫將使節久託恩門襲紫傳龜竊贊  
相延之慶抽毫進讀敢伸賓客之誠

賀秦少保男及第啓

陳阜卿

省元擅場南省次對西清臚傳肅唱於大庭風采復高  
于前列一人增體貌之重四方傾星斗之誠武偃文修

當昭代世臣之盛陰德陽報喜慶門有子之賢凡在聽聞舉深歡抃恭惟某官德充宇宙功贊陶甄中外倚太平之基父子著大儒之效彌綸治績有古王佐之才模範士情曰予天民之覺神相百祥之積嗣生一代之英淡墨書名魁星助台階之象紫荷入侍雲衢近天漢之章旋躋甲第之華光賁上游之選益隆譽處進拜寵榮教子義方得師承淵源之自有祖風烈永功名福祿之傳某迹託化鈞身拘官次誦衣冠之盛事贊恩閎袞袞

之祥阻賓客之後塵罄賀悃區區之蘊

賀人子及第啓

陳阜卿

慶發庭蘭榮攀月桂奏名墨榜欣巍壓于羣英策第楓宸竚首題于千佛喧騰士論喜溢親闈恭惟某官學海梯航儒宮柱石崇言閎議鬱為天下之宗師直道公心肅振臺綱之風憲久慰士林之望載瞻砌玉之芳想九齡與于玄文恥一經窮于皓首談論久聞于歆向才華兼擅于卿雲宜慙俗子之羸金況在故鄉而衣錦有是

父有是子價重搢紳無以立無以言訓聞詩禮宜地芥  
之俯拾看雲路之軒昂行觀至德之榮同居禁莞更聽  
玄成之貴繼踵台司某頃佐邑于鄞川獲樞衣于絳帳  
進而加諸膝雖子弟無以加焉退則銘于心若天地不  
能忘也側聞舞魚之騰踏謾馳賀燕之騅呼願展寸心  
輒先尺牘永言僭浼彌切凌兢

賀人及第啓

李守真

奏藝明廷策名上第喧前騶于廣路觀者肩摩落餘藁

于四方傳之紙貴望高時俊光動儒林乃太平養士之  
功亦諸生稽古之力恭惟某官天姿峻澈學術粹深壁  
水升堂七年並席金鑒通籍一鳴驚人蓋志大而氣豪  
故實修而名至落落高騫于日下錚錚獨韻于彀中御  
史直聲固遺風之自許平津相業不數載而可期某夙  
仰英游阻聞緒論方欲效李邕之識面慕盧仝之卜交  
奉詔殿廬幸觀落筆曳裾公府復枉過門惠然投我以  
夜光何有報君之玉案載懷深厚但極感藏通衢在望

絕足方道陽春白雪之音一時寡和金馬玉堂之步指  
日可期某猥預盛時喜聞榮捷雖仰洛中之價未親麈  
尾之談

賀人及第啓

林豈塵

兩家各生子惟城南能勸其讀書一門三秀才故天下  
皆歆其高第以古而視于今則榮恭惟某官學有新才  
文得真訣以胸中之氣獨尚而耿耿而紙上之語不為  
乎區區詞場敢對于別頭筆陣肯輸于先手沙州獨鳥

須嘗占鰲首之題桂林一枝今乃下龍鬚之拜雖黎嶺  
之姓名偶似亦莆陽之氣象所鍾士夫交口以劇談童  
稚祝身而願得一第恩子辛已見少年之文累月咎兒  
將不量老翁之分如其喜躍異乎尋常茲又得珠璣之  
投焉敢無瓊玖之報

賀人及第啓

張欽夫

承恩天陛拜慶親庭閭里為榮士友增慰惟策名委質  
當思忠義之勉圖而學道愛人豈其利祿之是慕願擴



昔賢之志永為鄉國之光

賀人及第啓

闕名

子可與娛舊竊慕銜推之請身為勸駕幸許從計吏之行旋聞璫榜之姓名益重鰐溪之人物恭惟某官文多奇氣學有古心獨婆娑乎海水之南豈棲遲乎衡門之下鯨波一釣手引六鼇雁塔初登名標千佛惟五嶺之外無而僅有故一國之中望以為榮造士論官本司馬司徒之職答兒嫁女亦老翁老婦之情某喜不自勝賀

非敢後偶未作咫尺之間遽先辱左右之書三年驚人  
知毋負賢能之舉一第恩子願勉登仕宦之途

賀王司理發舉啓

張子正

伏審文闡較藝貢籍登名式符連茹之公言不獨朋簪  
之私喜恭惟司理先輩辭高黃卷學富青箱家傳鶴髦  
之風流代出烏衣之人物聲騰珠樹譽報瑤林宜從世  
閱以拾青不待文場而脫白尚趨科選俯獵俊髦是誠  
強學而力行非謂因人而成事曲敦雅好遠逮好音載

嘉履尚之勤彌挹謙光之著詩書禮樂豈誦說之空文  
忠孝功名冀發施于實効但深依詠曷罄敷宣

賀人發漕司啓

蔣元輝

厭鄉黨之考藝不足發名就計庭而決科俱云得士凡  
為知識同助歡愉恭惟某人為蜀顯家出周惇史非逃  
于楊而入于墨願常守于師成豈愚于虞而智于秦盖  
始達于賞鑒勉登高第以副願言

賀人發漕司舉啓

宋嗣宗

蔚以詞華衰為舉首英名居八郡之最儒術耀一時之  
光聲氣所同歡愉惟一伏惟某人家傳師友胄出公侯  
復元古而貴清真會羣才之有作抱遺經而究終始得  
五傳之未傳宜收稽古之功亟取驗今之效果由造選  
起以文鳴驚驥足以先登連雁行而直上一戰決勝已  
觀霸主之凱旋二雋俱來當見洛陽之聳動某猥緣奉  
檄獲遂旁觀與盛事以知榮修慶緘而無所好音俯逮  
弱質增華不意餘光及此衡茅之下尚期後幸游公兄

弟之間感激云深書言莫盡

賀人發舉啓

宋仲淵

較藝專場第名人等持衡藻鑑雖分諸路之權入的英  
雄實盡一時之選伏惟某人儒林挺秀國器應時奧學  
深造于淵源拔藻實兼于麗則掩徐謝之譽豈惟錦綉  
之帷聯愈觀之名是稱龍虎之榜顧茲流寓獲預榮觀  
特迂高蓋之臨兼賁華牋之辱誦高文於廣坐已蜚日  
下之英聲冠大對於嚴宸更看泉南之盛事

賀人發舉啓

魏仲光

伏審明詔烝髦適逢千載真賢入彀列在三人里閭爭  
望于餘光韋布僉騰于公議側聞盛舉倍激歡悰恭惟  
貢士三輩柱史孤標錦囊妙句家傳人物尚餘倒屣之  
聲名世襲風流猶想脫靴之意氣聊俛從于場屋定俯  
拾于科名廼蒙車蓋之親臨先辱滕緘之見及神仙特  
秀曾非雲路之遙台宿連輝彌覺星階之近但深佩服  
曷究悃私

賀人發舉啓

張欽夫

起從里選遂預計偕顧茲勸駕之初是乃策名之漸惟  
國之取士豈將富貴其身而士之逢時蓋厲忠嘉之節  
行觀大對用卜遠圖願希董子之奏篇更加剴切毋若  
公孫之曲學徒取譏羞輒因報貺之詞少致贈言之義  
敷陳罔既悚惕增添

賀人發舉啓

晁子西

預鄉大夫而薦賢此云公選為郡刺史而勸駕實有光

榮特枉來牋敢忘至意恭惟某人才無俊造學富淵源  
遠自先儒不減西河之化善為高論猶有東坡之風及  
試于廣福之庭殆多于矍相之圃鞠躬以入拭目可觀  
嗟我士無譁不閔有司而不累公上諸大夫皆曰以補  
文學而以為郎中蓋考行以宜然故歷年而未有豈其  
老守蒙此休聲當更懋于遠圖遂先登以高第

賀人發舉啓

鄭元顯

秋闈獻賦預唐家流寓之科天府登名亞周室賓興之



選斯名一著吾道有光伏以秘校省元學有本原性無  
塵滓想見筆耕于平日用能脫穎於妙年姑試長才以  
當大敵拔齒擢角而仕位僅有存焉志目中眉其去的  
蓋幾希矣爰乘銳氣遂啓前行諒所向易于摧枯顧其  
成有如拾芥崢嶸桂籍收事業于青春榮耀萱堂副義  
方之素志佇觀騰踏式慰有朋

賀人發舉啓

林豈塵

程度既中無患有司之不公簡擇甚精已見羣儒之相

賀蓋十室之必有忠信故三年而賓興賢能豈徒為槐  
花舉子之忙當默應柳汁神君之夢一第恩子誰云浪  
者之亦為官累月答兒將見老翁之不量分

賀人發舉啓

林豈塵

三年取士選試官得鴻生一鳴驚人興吾宗必有子想  
其含英咀華而自得其趣故其操觚濡墨而盡寫所長  
雖儒林枝葉之相傳亦泮水淵源之所自莆陽有識姓  
亦在徐鄭之間黎嶺題詩名當繼藻蘊之後

賀人發舉啓

李舜臣

伏審妙膺里選榮中賢科于鄉有光在道增貴伏惟慶  
慰國家復古于三代之後造士以六經之純號令僅及  
于期年學校必興于四海宜得成才之彥用彰樂育之  
能果有譽髦來入英彀伏以某人行純而懿學博以文  
筆陣掃乎千軍書帙破乎萬卷玉韞於櫝久懷善價之  
求鳶飛至天果預作新之慶某繆緣隨牒叨此脩員心  
迷吏牘之煩望絕儒林之盛豈圖推致尚辱顧存賜書

以先為禮甚寵漸離技癢竊自負于知音李廣數竒敢  
復論于故將第荷謙冲之旨不忘感慰之懷

賀正

賀秦太師正啓

李舜臣

銅儀肇序道已泰于三陽玉歷明時祥必開于五始仁  
賢所履戢穀攸同恭惟太師一德享天孤忠許國躋斯  
民於仁壽之域措當世於泰和之期盛德大業而上際  
下蟠偉績豐功而輝今騰古乾坤整頓已臻晏粲之休

宗社監觀應享龐淳之慶當兩儀之交泰宜百祿之是  
適某自顧鈍頑久居垓圯欣逢穀旦尚小壘之是拘阻  
奉椒觴望崇墀而莫及其為欣抃實倍等倫

賀文太師正啓

程子山

伏以天序更端人正啓旦實四方之資始慶萬寶之咸  
亨恭惟某官道冒羣倫德隆間世服華夷之重望著社  
稷之茂勲坐隆師席之儀刑益重聖朝之羽翼為國碩  
父四方猶聳于具瞻亨時休嘉百福同資于康壽某屬

臨獻歲阻跪慶觴仰企崇墉益馳勤頌

賀太師正啓

汪彥章

四序更端三元啓旦紀天時之資始慶物類之向榮伏  
惟某官道冒羣工德隆四海服華夷之重望著社稷之  
茂勲儼居師席之崇增重聖朝之本為國碩艾四方咸  
賴于熙安享時休嘉百福宜資于康壽某屬臨獻歲奉阻  
壽觴企仰門閤益馳頌詠

賀丞相正啓

毛伯穎

王正次春順孟陬而謹始代天理物頒象魏以布和宜  
有百祥永綏一德恭惟某官寅亮天地鎮撫國家經體  
贊元默運燮調之化行慶施惠荐更開泰之辰順受春  
祺永扶斗極某備員師帥遠託鈞陶春日載陽雖抱哀  
遲之感農祥是正敢忘勸課之勤

賀丞相正啓

張守真

伏以堯歷開端夏正啓旦肇天陽之來復慶人道以更  
新伏以某官海岳純靈華夷重望勲業久書於竹帛謀

謨動應於典刑從容黃閣之經綸密勿清衷之簡注羽  
儀元化久施蕪善之功領袖上台式副具瞻之美方三  
朝之順履宜百福之駢臻某叨領藩符阻前槐舍永言  
祈頌曷罄敷陳

賀左右僕射正啓

汪彥通

伏以歷授人時謹新陽之用事史觀天象審正歲之開  
端伏惟某官全德自天禔身許國眷注久隆於旒宸勲  
勞夙著於鼎彛經綸三事之司表式百寮之右調成元



化已施濟物之仁順履嘉辰益集自天之祐某猥司宮  
鑰阻造台閤徒馳詠頌之誠莫罄編摩之福

賀參政正啓

宋大用

鳳歷更華龍躔易次實四序履端之始當三陽北進之  
初恭惟參政相公正直提身忠嘉許國遇中興之盛旦  
茂夾輔之元勳聚精會神當兩儀之交泰鼎新革故宜  
百祿之是邁

賀兩府正啓

朱子山

三陽大亨一歲更始此天地交泰之際乃精神會聚之時宜有吉祥來薦君子恭惟某官翊亮三世儀刑百工適當龍躍之初屹有棟隆之任天其或者將俯屬於治平神實聽之方共扶于業履況三微之在序惟百祿之是膺立我烝民繫股肱之是賴錫公純嘏與邦社以同休

賀侍從正啓

宋仲山

天道履端月旅姬訾之次人正布治令頒象魏之和惟

輔弼之正臣受福祥於上日恭惟某官體賢人之久大  
運君子之中庸同寅協恭久著訏謨之效行慶施惠存  
更開泰之辰宜茂對於春祺遂翊登于大業某脩員遐  
壤遠託鴻鈞春日載陽慨侵尋於年事農祥是正第勸  
課於民功

賀宮使少保正啓

吳子文

帝出乎震太簇交律氣之和星回於天營室直寅塗之  
次物所自始人其施生恭惟宮使少保大觀文柱石朝

欽定四庫全書

五百家播芳大全文粹  
卷二十五

二十二

家箕裘相業志蘊經綸之素烈躋寅亮之崇英聲茂實  
而騰古輝今粹學高文而光前絕後明良相遇精神聚  
會於一堂宗社垂休福祿永隆於四宇式當兩儀之交  
泰茂膺百順之來宜

賀宮使丞相正啓

汪彥章

史觀天象審正歲之開端歷授人時謹新陽之用事恭  
惟某官大忠許國全德自天聳多士之儀刑隆四朝之  
羽翼文持化軸浸惠澤於黎元累冠公台著勲庸于宗

社引年歸政養福在躬遶臨元吉之辰並享休嘉之慶  
某屬分郡紱阻跪壽觴其在瞻依豈勝禱頌

賀帥相端明正啓

程子山

運回一氣卦畫三陽方天地之泰通契君臣之感會恭  
惟某官著龜先覺柱石元勲早贊化於西樞暫偃藩於  
東面道乘時長福以類來竚膺袞黼之褒即正鈞衡之  
位某限拘官守阻造賓闕

賀留守丞相正啓

黃大年

天道履端月旅姬訾之次人正布治法垂象魏之和宜  
輔世之正臣享格天之盛福恭惟某官道光伊呂學貫  
孔周成謨夙著於廟堂均逸暫留於藩翰兼資文武蔚  
為百辟之表儀身係安危共仰一朝之耆碩屬此履新  
之節適當促覲之期崇論宏言蘊忠誠而入告隆名異  
數與剛德以偕升某托迹鴻鈞脩員遠服春祺湛湛喜  
聞衮繡之來歸輿誦每每但見壺觴之相慶其為瞻頌  
曷罄敷陳

賀帥相大資正啓

游如山

伏以周官布政順兩儀交泰之時魯史書元肇萬物發  
生之化伏惟某官早隆耆望克邁壯猷秉斯道以覺民  
蠶至誠而許國謀謨近弼天子每器其能密勿中樞朝  
廷孰出其右久安外鎮固鬱具瞻茲茂對於昌辰宜倍  
膺於繁祉某阻仲慶壽第切馳誠其在詠瞻豈勝云喻

賀留守大資正啓

陳君舉

伏以玉瑄發春蒼靈乘序經書元統繫萬事以開端易

著泰爰肇三陽而首化伏惟某官才無文武德備忠嘉  
以學術冠映士林以謀謨夾輔王室睿衷眷倚固有異  
於列藩碩福繁昌宜亟膺於召節履是歲初之吉脩迎  
神貺之休某阻奉壽觴第深瞻頌

賀帥相大資正啓

毛伯穎

伏以五始謹元遠啓履端之候三朝首祚肇開有德之  
朝伏惟某官廊廟宏才國家重器機沉物表道覺民先  
夙參右府之嚴屢摠佉藩之寄固宜令序茂擁繁休某




限領守符阻前慶禮其為瞻頌曷罄敷陳

賀帥相大資正啓

曾仲通

伏以四序首端三元啓旦紀天時之資始慶物類之向  
榮伏以某官德履在躬忠誠許國久更侍從之要遂摠  
權衡之司歷守劇藩悉登美政惟宸衷眷倚之舊矧士  
論係瞻之勤佇促鋒車入陪柄任履茲元序宜集繁禧  
某阻慶壽觴馳誠賓廡



五百家播芳大全文粹卷二十五